

四庫全書

經部

欽定四庫全書

經部

禹貢指南

御製詩

卷二

詳校官給事中_臣李臺

通政使司副使_臣莫瞻菴覆勘

總校官進士_臣繆琪

校對官中書_臣吳裕德

謄錄監生_臣沈希曾

御製題毛晃禹貢指南六韻

微禹其魚功不刊導川敷土下民安九州既奠爰分域
四海會同永宴瀾毛晃指南因有述文淵闕氏乃無端

宋史藝文志不載是書明焦竑經籍志載禹貢指南一卷宋毛晃撰自為可據而朱彝尊經義考則云未見又云文淵閣書目有之不著撰人書目成于楊士奇與焦竑為同時不應書成而佚其姓名豈未加深考耶焦竑志籍傳名著朱子說書取訓鑽千古淵源率由邇諸

家附會概祛謬獨于分野稱星宿未識恢恢天道寬

史記

夫官書二十八舍主十二州注引星經如云角亢鄭之分野之類乃以二十八宿主十二州分配無餘此外更

當何屬夫天無不覆星麗乎天亦當無不照今十二州
皆中國之地豈中國之外不在此昭昭之內乎且其間
有地少而星多亦有地多而星少以天度地輿準之亦
不均如井鬼為雍州陝西甘肅皆是其道里之廣已非
兩舍所能該而今拓地遠至伊犁葉爾羌喀什噶爾較
禹貢方隅幾倍蓰其地皆在甘肅以外將以雍州兩星
概之乎抑別有所分屬乎此又理之難通者蓋分野之
說本不足信而灾祥則更鄰于讖緯皆非正道見是編
于山水原委考證明當不泥諸儒附會之說故朱子書
說蔡氏集傳多用之獨惜其引春秋元命苞謂某星散
為某州流為某州并載及占驗與分野說雖
不同而意則相似猶不免于拘墟之見耳

欽定四庫全書

經部二

禹貢指南

書類

提要

臣等謹案禹貢指南四卷宋毛晃撰晃宋史無傳其始末未詳世傳其增註禮部韻畧于紹興三十二年表進自著曰衢州免解進士蓋高宗末年人也是書宋史藝文志不著錄據竝經籍志載禹貢指南一卷宋毛晃撰朱

彙尊經義考云未見又云文淵閣書目有之不著撰人疑卽晃作則舊本之佚久矣今考永樂大典所載與諸家註解散附經文各句下謹綴錄成篇釐為四卷以世無傳本其體例之舊不可見謹以經文次第標列其無註者則經文從畧焉其書大抵引爾雅周禮漢志水經註九域志諸書而旁引他說以證古今山水之原委頗為簡明雖生於南渡之後

僻處一隅無由睹中原西北之古蹟一一統
核其真而援據考證獨不泥諸儒附會之說
故後來蔡氏集傳多用之亦言地理者所當
考證矣乾隆四十三年六月恭校上

總纂官臣紀昀陸錫熊臣孫士毅

總校官臣陸費墀

欽定四庫全書

禹貢指南卷一

宋 毛晃 撰

冀州

爾雅兩河間曰冀州郭璞注曰自東河至西河李巡
注曰兩河間其氣清厥性相近故曰冀冀近也 周
禮職方氏河內曰冀州謂其在三河之內蓋東河之
西西河之東南河之北也 案禹貢導河積石自積

石而下南流謂之西河至于華陰折而東經砥柱山
又東逕孟津東過洛水之北皆東流謂之南河至于
大伾山折而北流過降水至于大陸又北播為九河
同為逆河入于海謂之東河爾雅言兩河間者舉其
二則三可知也 晉地理志春秋元命苞云昴畢散
為冀州亂則冀安弱則冀强荒則冀豐 孔安國曰
舜分冀州之域為幽州并州孔穎達曰據職方氏幽
并山川皆冀州之域故安國知之 杜牧罪言禹畫

九土一曰冀州程其水土與河南等常重十一二以其恃強不循理冀其必破弱雖已破冀其復強大因以為名

既載壺口

九域志河東隆德府潞州上黨郡上黨縣壺口山在上黨東太行山在上黨南漢地理志在河東郡北屈縣東南今隰州吉鄉縣也

治梁及岐

梁山 在左馮翊夏陽縣西北 水經河水南逕梁山原東酈道元注自原山東南至河晉之望也穀梁傳成公五年梁山崩遏河水三日不流晉侯以問伯宗即是處也 九域志今永興縣即同州馮翊郡定國軍有梁山山在龍門之南

岐山 水經在右扶風美陽縣西北梁岐二山在雍州今于冀州言之者豈當時河患上及梁岐乎禹導底柱則壺口平而梁岐自治因河而言非以二山為

冀州之地也

既修太原至于岳陽

太原晉陽也今并州之地高平曰原此又原之大者

太岳導山序壺口雷首至于太岳水經太嶽山在

河東永安縣南職方氏冀州山鎮曰霍山案霍山有

二在冀州者又謂之太岳在荊州者又謂之天柱山

潞水出焉漢地理志作岳陽注在太原西南

覃懷底績至于衡漳

覃懷 九域志今河北西路懷州河內郡即其地

濁漳水一名降水導河序北過降水至于大陸是也

顏師古注漢地理志衡漳謂漳水橫流入河也

水經清漳水出上黨沾縣西北少山大鴈谷南過

縣西又從縣南屈東過涉縣西屈從縣南東至武安

縣南忝窰邑入于濁漳酈注淮南子曰清漳出揭戾

山高誘云在沾縣漢分沾縣為樂平郡治沾縣晉太

康地記曰樂平縣舊名清漳涉縣魏郡之屬縣也

九域志河北東路冀州信都郡定武軍有昌亭城
水經云漳水東北至昌亭今滹沱衡漳水今長蘆河
則其故瀆也

厥賦惟上上錯厥田惟中中

諸州雜賦 冀上上錯揚下上上錯豫錯上中梁下
中三錯

諸州田賦 雍田上上徐田上中青田上下豫田中
上冀田中中兗田中下梁田下上荆田下中揚田下

下冀賦上上豫賦雜出亦上上冀賦雜出上中豫賦
亦上中荆賦上下青賦中上徐賦中中堯雍之賦中
下揚賦雜出亦中下揚賦下上梁賦雜出亦下上梁
賦下中梁賦雜出又下下雍青徐以上地出中賦冀
以中地出上賦

恒衛既從大陸既作

恒水 出常山上曲陽東入滏水 水經滏水出代
郡靈邱縣高氏山南過廣昌縣南又東南過中山上

曲陽縣北恒水從西來注之注瀛水兼納恒川之通稱

衛水 出常山靈壽縣東北入滹沱河

大陸 在鉅鹿縣北爾雅晉有大陸注今鉅鹿北廣河澤是也大陸之野一名朝歌商紂之所都也 水

經注引應劭曰麓者林之大也尚書曰堯將禪舜納之大麓之野烈風雷雨不迷致之以昭華之玉而縣取目焉秦始皇二十年滅趙以為鉅鹿郡漢景帝中

元元年為廣平郡武帝征和三年為廣平侯國光武
中興更為鉅鹿今屬邢州汲郡修武縣亦有大陸

島夷皮服

島夷 漢地理志作鳥夷顏師古曰東北夷搏取禽
獸食其肉衣其皮也一說居海島被服容止皆象鳥
作鳥謂居海島也

夾石碣石入于河

碣石山 在海畔右北平驪城縣西南河自碣石山

南渤海之北入海夾右夾音挾自海入河逆流而西
右顧碣石如在挾掖也 水經碣石山在遼西臨渝
縣南水中注大禹鑿其石右夾而納河秦始皇漢武
帝皆嘗登之海水西侵歲月逾甚而苞其山故言水
中也 水經河水東北過甲下邑濟水從西來注之
又東北入于海又東分為二水枝津東逕甲下城南
東南歷常沈注濟注經言濟水注河自枝津東北流
逕甲下邑東北流入于海淮南子曰河九折注為海

而流不絕者崑崙之輸也禹貢曰夾石碣石入于河
山海經曰碣石之山繩水出焉東流注于河河之入
海舊在碣石今川流所導非禹瀆也周定王五年河
徙故瀆故班固曰商竭周移也顏師古曰言禹夾
行此山之右而入于河逆上也孔傳同凡九州末
言由諸水入河者皆通舟楫漕運以達京師也

濟河惟兗州

東南據濟西北距河河濟之間相去不遠兗州之界

止于濟也 爾雅濟河間曰兗州注自河東至濟

周禮職方氏河東曰兗州 武王封周公子伯禽于
曲阜為魯侯秦為薛郡後魏置南兗州于譙城置西
兗州于定陶城隋改為魯州唐武德初平徐圓朗復
為兗州 晉地理志兗州濟河地舜置十二牧則其
一也春秋元命苞云五星流為兗州兗端也信也又
曰蓋取兗水以為名焉

九河既道

徒駭 郭璞曰今在成平縣義未聞

太史 郭璞曰今所在未詳

馬頰 郭璞曰河勢上廣下狹狀如馬頰

案原本缺太史馬頰

二河今補入

覆鬴 郭璞曰水中可居住往而有狀

案今本爾雅注作水中可

居住而有狀如覆釜

胡蘇 郭璞曰東莞縣今有胡蘇亭其義未詳

簡 郭璞曰水道簡易

絜 郭璞曰水多約絜

鉤盤 郭璞曰水曲如鉤流盤桓也

鬲津 郭璞曰水多阨狹可隔以為津而橫渡

爾雅九河皆禹所名 正義曰河自大陸以北數為九河謂大陸在冀州嫌九河亦在冀州故云在此州界也河從大陸東畔北行而東北入海冀州之東境至河之西畔水分大河東為九道故知在兗州界平原以北是也李巡曰徒駭禹疏九河以徒衆起故云

徒駭太史禹大使徒衆通其水道故云太史馬頰河
勢上廣下狹狀如馬頰也覆釜水中多渚徃徃而處
形如覆鬴胡蘇其水下流故曰胡蘇胡下也蘇流也
簡大也河水深而大也絜言河水多山石治之苦絜
絜苦也鉤盤言河水曲如鉤屈折如盤也鬲津河水
狹小可鬲以為津也孫炎曰徒駭禹疏九河用功雖
廣衆懼不成故曰徒駭胡蘇水流多散胡蘇然其餘
同李巡導河篇云濟水故渠今在冀州西界大陸

今在德州德平縣經滄州清池縣西北太史今在德州安德縣東南經滄州臨津縣西馬頰在德州北平縣經安德縣西南恩州漳南縣東棣州商河縣北覆鬴今在永靜軍阜城縣東經東光縣西北胡蘇今在滄州南皮縣東光縣北經滄州無棣縣西北絜今在滄州南皮縣經滄州臨津縣鉤盤今在德州德平縣西經滄州樂陵縣東棣州陽信縣北滄州樂陵縣西南鬲津在德州平原縣東經滄州臨津縣東樂陵縣

西饒安無棣縣南並在德州平原以北惟簡河亡焉
同為逆河入于海今大名府石奔故瀆在焉

雷夏既澤

雷夏澤 在濟陰成陽西北 水經注云雷澤西南

十許里有小山山北有小阜南屬池澤之東北有陶
墟郭緣生言舜陶所在墟阜聯屬濱帶瓠河也一云
舜所漁處本名夏澤

灘沮會同

灘水 灘於用切爾雅水自河出為灘又云河有灘
又云灘反入郭注河水決出復還入者河之有灘猶
江之有沱 漢地理志作雍沮沮水出常山元氏縣
入河雍水不言出入

沮水 沮七餘切案沮水與雍州沮水不同荊州沮
水在房陵左傳所謂江漢沮漳楚之望也導川云漆
沮既從即雍州之沮也今此沮水自會同于雷夏之
間非雍州之沮也水經不著所出或云沮水出北地

直路縣入洛洛非河南洛水也

厥土黑墳

土黑墳墳扶粉切土脉墳起也

厥田惟中下厥賦貞

田中下第六

賦貞賦與田相當

厥篚織文

篚織文

漢地理志篚字作斐顏師古曰斐與篚同

竹器筐屬織文錦綺之類 冀州不言貢篚貢者下
以職供之謂也冀州帝都所在無所效其臣職故也
浮于濟澤達于河

濟水 沅水東流為濟 爾雅濟為漣漣音楚濟水
出河東垣縣王屋山東南至河內武德縣入河並流
而南截河又並流溢出乃為滎澤也 水經濟水出
河東垣縣東王屋山為沅水又東至溫縣西北為濟
水又南當鞏縣北南入于河與河合流而東過滎陽

縣北 漢地理志濟作洙州末言浮于濟潔達于河
顏師古曰浮以舟渡也達通也因水入水曰通 又
解在導川沅水濟水下

漂水 出東郡東武陽縣至樂安干乘縣入海 水
經漂水東出于高唐縣大河右迤東注漂水酈道元
注曰桑欽地理志曰漂水出高唐余案竹書穆天子
傳稱丁卯天子自五鹿東征釣于漂水是日祭丘已
巳東征食馬于漂水之上尋其沿厯逕趣不得近高

唐也桑氏所言蓋津流出次于其間也地理風俗
記曰漯水東北至于千乘入海河盛則通津委海水耗
則微消絕流

海岱惟青州

東北據海西南距岱

青州 東北跨海及遼東舜分青為營州即遼東也
漢末公孫度據遼東自號青州刺史爾雅齊曰營州
郭注自岱東至海此蓋商制無青州并青于徐周制

有青無徐并徐于青故職方氏正東曰青州其山鎮
曰沂山其澤藪曰望諸其川淮泗其浸沂沭 晉地
理志青州蓋取土居少陽其色為青故以名也春秋
元命苞云虛危流為青州

嶧夷既畧

嶧夷 堯命羲仲所宅處以其在東日所出故曰暘
谷

維淄其道

濰水 出琅邪箕屋山北至都昌縣入海 水經濰
水出琅邪箕縣東北過武城縣西又北過平昌縣東
又北過高密縣西又北過淳于縣東又東北逕都昌
縣東又東北入于海注云濰水導源濰山許叔重呂
忱云濰水出箕屋山淮南子曰濰水出覆舟山蓋廣
異名也

淄水 出泰山萊蕪縣原山東北至千乘博昌縣入
海 水經淄水與汶水同出泰山萊蕪縣原山東北

又東北過臨淄縣東又東過利縣東又東北入于海
漢地理志濰淄作惟淄顏師古曰濰淄惟淄古今
通用道讀曰導導治也一說水復故道音上聲一音
導謂導道而流也

海濱廣斥

斥鹵地也漢志海濱作海瀕廣斥作廣瀉注瀕音頻
又音濱瀉音昔

厥田惟上下厥賦中上厥貢鹽絺海物惟錯岱畎絲枲

鉛松怪石菜夷作牧廐籬廩絲

田上下第三

賦中上第四

貢鹽締海物絲泉鉛松怪石籬廩絲 顏師古曰廩
桑也食廩之蠶絲可以絃琴瑟或曰廩山柘也蠶食
柘葉者絲黃而韌可以為絃

菜夷 春秋夾谷之會萊人以兵刳魯定公孔子曰
兩君合好而夷裔之俘以兵亂之是知古者東萊之

有夷也夾音刮 應劭十三州記曰泰山萊蕪縣魯

之萊柞邑也左傳與之無山及萊柞

案左傳本作辭以無山與之萊

柞是也齊靈公滅萊萊民稍流此谷邑落荒蕪故曰

萊蕪漢高祖置縣萊山之夷周曰萊子國漢曰東萊
浮于汶達于濟

汶水 爾雅汶為瀾瀾音闡 水經汶水出泰山萊

蕪縣原山西南過嬴縣南又東南過奉高縣北屈從
縣西南流過博縣西北又西南過蛇邱縣南又西南

過岡縣北又西南過平章縣南又西南過無鹽縣南
又西南過壽張縣北又西南至安民亭入于濟注萊
蕪縣在齊城西南原山又在縣西南六十里許地理
志汶水與淄水俱出原山西南入泲故不得過其縣
南也從征記曰汶水出縣西南流淮南子汶水出
朱虛弗其山乃東汶水非此也諸州之末皆記入
河水道以堯都在冀而河行于冀也青州雖不言河
而曰達于濟則因濟達河也地理志州末言浮于

汶達于泚顏師古曰言渡汶水西達于泚也青州不言河由兗而見也兗州之末言浮于濟潔達于河謂渡濟潔而通河也青州次兗故言達于濟達通也因水入水曰通渡汶通濟則渡濟可以通河矣

海岱及淮惟徐州

徐州 爾雅濟東曰徐州注云自濟東至海李巡注曰淮海間其氣寬舒稟性安徐故曰徐徐舒也 周禮職方氏無徐州正義曰以徐州合之于青州青州

分為幽并 晉地理志徐州于周入青州之域春秋
元命苞云天氏流為徐州蓋取舒緩之義或曰因徐
邱以立名

淮沂其乂

淮水 出桐柏山其源遠矣于此言之者淮水至此
而大為害尤甚喜其治故于此紀之 淮水出胎簪
山東北過桐柏胎簪蓋桐柏之旁小山也 水經淮
水東至廣陵淮浦縣入于海 顏師古注漢地理志

淮水出大復山 九域志壽春府有淮瀆 胎簪山

在南陽平氏縣

沂水 水經注沂水出尼邱山西北經魯之雩門曾
點浴乎沂者非禹貢沂水也

蒙羽其藝

蒙山 水經注云禹貢有兩蒙山在徐州者在泰山

蒙陰縣西南在梁州者在蜀郡青衣縣今曰蒙頂

羽山 水經注在東海祝其縣南山西有羽淵禹父

之所化其神為黃能入于羽淵 山海經曰洪水滔
天鯀竊帝之息壤以堙洪水不待帝命帝令祝融殺
鯀于羽郊 漢地理志藝作蓺

大野既豬

爾雅魯有大野郭璞注今高平鉅野縣東北大澤是
也 鉅野縣今屬濟州 漢地理志作大埜 春秋
左氏傳哀公十四年春西狩于大野叔孫氏之車子
鉏商獲麟杜預曰大野在東平鉅野縣東北大澤是

也 周禮職方氏大野屬兗州澤藪

東原底平

東原 今東平郡鄆州在魯之西獲麟之地

羽畎夏翟嶧陽孤桐泗濱浮磬淮夷蠙珠暨魚厥篚玄
織縞

漢地理志夏翟作夏狄泗濱作泗瀕暨魚作泉魚

篚元織縞 言獻黑細繒及鮮支也或謂織言質之
細而元之與縞其色也以織該于元縞之中則色雖

不同皆纖質也此乃古史立言之法猶雲土夢然耳
禮記注云元與縞謂之纖一曰白經黑緯曰纖詩
注亦作縵

浮于淮泗達于河

漢地理志州末言浮于淮泗入于河顏師古曰渡二
水而入于河

汴河 右自淮泗入河必道于汴世謂隋煬帝始通
汴入泗禹時無此水道以疑禹貢之言此特學者攷

之不詳而已案前漢書項羽與漢約中分天下割鴻溝以西為漢以東為楚文穎注云于滎陽下引河東南為鴻溝以通宋鄭陳蔡曹衛與濟汝淮泗會于楚即今官渡水也魏曹操與袁紹相持于官渡乃楚漢分裂之處蓋自秦漢以來有此安知非禹跡也禹貢九州之末皆記入河水道而淮泗獨不能入河帝都所在理不應爾意其必開此道以通之其後或為鴻溝或為官渡或為汴上下百餘里間不可必然皆引

河水而注之淮泗也故王濬伐吳杜預與之書曰足
下既摧其西藩當徑取秣陵討累世之逋寇釋吳人
于塗炭自江入淮逾于泗汴沂河而上振旅還都亦
曠世一事也王濬舟師之盛古今絕倫而自汴水沂
河可以班師則汴水之大小當不減于今又足以見
秦漢魏晉皆有此水道非煬帝創開也自唐以前汴
泗會于彭城之東北然後東南入淮近歲汴水直達
于淮不復入泗矣吳王夫差開溝通水與晉會黃池

而江始有入淮之道禹時則無之故禹貢曰沿于江海達于淮泗明非自海入淮則江無通淮之道今徐州之末直云浮于淮泗達于河不言自海則鴻溝官渡汴水之類自禹以來有之明矣特濬堙不常故晉劉裕王仲德開鉅鹿入河則泗水不由汴入河其後鉅野道塞故汴至彭城東北入泗又東南入淮又其後不復入泗直達于淮鉅野道復開由彭城出東平而入河汴水不復治矣煬帝豈復濬之乎雖江淮亦

有可疑者以孟子排淮泗而注之江之言攷之則其道尚矣夫差亦復濬之爾

淮海惟揚州

爾雅江南曰揚州注云自江南至海 李巡注曰江南其氣燥勁厥性輕揚故曰揚揚輕也 周禮職方氏東南曰揚州其山鎮曰會稽其澤藪曰具區其川三江其浸五湖 晉地理志引春秋元命苞云牽牛流為揚州分為越國以為江南之氣燥勁厥性輕揚

亦曰州界多水水波揚也于古則荒服之國戰國時
其地為楚分

彭蠡既豬

彭蠡 漢水南入于江東匯澤為彭蠡在彭澤西北
今南康軍湖是也

陽鳥攸居

陽鳥 漢地理志陽鳥攸居作迺居 孔叢子小爾
雅廣鳥篇去陰就陽者謂之陽鳥鴻鴈是也今曰陽

鳥豈誤寫鳥字作鳥邪抑亦通稱也邪

三江既入

三江 水經南江東北為長瀆歷河口東南注于具
區謂之五湖口東則松江出焉江水奇分謂之三江
口酈道元注曰吳越春秋稱范蠡去越乘舟出江之
口入五湖之中也此亦別為三江 庾仲初揚都賦
注曰今太湖東注為松江下七十里有水口分流東
北入海為婁江東南入海為東江與松江而三也

水經又云三江口之水又東至會稽餘姚縣東入于海注云謝靈運云具區在餘姚然則餘暨是餘姚之別名也今餘暨之南餘姚西北浙江與浦陽江會同歸海但水名已殊非班固所謂南江者也郭璞曰三江者浙江松江岷江也然浙江出南蠻中不與岷江同作者述誌多言江水至山陰為浙江今南江枝分歷烏程縣南通餘杭縣則與浙江合故闕駟十三州志曰江水至會稽與浙江合浙江自臨平湖南通浦

陽江又于餘暨東通浦陽江自秦望分派東至餘姚
縣又為江也 顏師古注漢地理志曰三江謂北江
中江南江也 韋昭注史記曰三江謂吳松江錢塘
江浦陽江也 蘇東坡曰三江之入古今皆不明予
以所見攷之自豫章而下入于彭蠡而東至海為南
江自蜀岷山至于九江彭蠡以入于海為中江自嶓
冢導漾東流為漢過三澁大別以入于江滙為彭蠡
以入于海為北江此三江自彭蠡以上為二自夏口

以上為三江漢合于夏口與豫章之江皆滙于彭蠡
則三江為一過秣陵京口以入于海不復三矣然禹
貢猶有三江之名曰北曰中者以味別也蓋以三水
性不相入江雖合而水味異故至于今而有三泠之
說古今稱唐陸羽知水味三泠相雜而不能欺不可
誣也予又以禹貢之言攷之若合符節書之叙漢水
也曰嶓冢導漾東流為漢又東為滄浪之水過三澨
至于大別南入于江東滙澤為彭蠡東為北江入于

海夫漢既已入江且滙為彭蠡矣安能復出為北江
以入于海乎知其以味別也書之叙江水也曰岷山
導江東別為沱又東至于澧過九江至于東陵東迤
北會于滙東為中江入于海夫江既已與漢合且滙
為彭蠡矣安能自別為中江以入于海乎知其以味
別也漢為北江岷山之江為中江則豫章之江為南
江不言可知矣禹以味別信乎曰濟水既入于河而
溢為滎禹不以味別安知滎之為濟也歟堯水之未

治也東南皆海豈復有吳越哉及彭蠡既豬三江入海則吳越始有可宅之土水之所鍾獨震澤而已故曰三江既入震澤底定孔安國以為自彭蠡江分為三入震澤為北江入于海疏矣蓋安國未嘗南遊案經文以意度之不知三江距震澤遠甚決無入理而震澤之大小決不足以受三江也班固曰南江從會稽吳縣南入海中江從丹陽蕪湖縣西東至會稽陽羨東入海北江從會稽毗陵縣北東入海會稽丹陽

容有此三江然皆是東南枝流小水自相派別而入海者禹貢所謂中江北江自彭蠡出者也徒見禹貢有三江中北江之名而不悟一江三泠合流而異味也故雜取枝流小水以應三江之數若使此三者為三江則是與今京口入海之江為四矣京口之江視此三者猶畎澮禹獨遺大而數小何邪此蘇氏之說也予謂三江之說古今諸儒互相矛盾學者徒取北江中江以為三江之目而不知禹貢中無南江之目

是未免乎牽合也蘇氏味別之說尤為難據且江漢之水皆滙為彭蠡以入海而不三出矣安有中北之辨乎況三江距震澤為遠禹貢言三江既入然後震澤之水有所洩而底定明知揚州之地自有三江非江漢中江之江也案水經有三江口五湖口疑禹貢所謂三江者即三江口也蓋言三江口水入海則震澤之水有所洩而底定此理甚明其文連屬震澤而設非謂南江中江北江與義興毗陵吳縣之江也故

導川叙江與漢雖言中江北江而不言三江是知三江為三江口也猶言五湖然虞翻曰太湖有五湖曰太湖曰洮湖曰射湖曰貴湖與太湖而五並太湖之小支俱連太湖兼得五湖之名在今湖州東即水經所謂南江東北為長瀆歷河口東南注于具區謂之五湖口東則松江出焉江水竒分謂之三江口吳越春秋稱范蠡去越乘舟出三江之口入五湖之中是也非謂洞庭番禺陽青草之五湖也蘇氏以岷山之江

為中江漢水為北江豫章之江為南江不知豫章之江何從出哉使豫章之江同入于匯澤而入海則書當叙豫章之江北入中江如滄浪南入于江之類可也今則不聞是亦未免牽合也以書攷之其曰東迤北會于匯東為中江入于海孔氏傳曰迤溢也東溢分流北會彭蠡舉其說謂岷山之江本不匯于彭蠡但迤溢分流為二其支北匯于彭蠡出為中江其本為南故漢江為北而王荊公以謂一江自義興一江

自毗陵一江自吳縣義興古之陽羨毗陵今之丹徒
春秋謂之延陵季札所居之地吳縣今之吳江三江
介于常潤蘇三州之間而震澤瞰乎三州之界尾通
吳興苕霅之水出焉此言殆與班固相表裏然雖詳
而無統槩之禹貢之文不若孔氏之傳為稍長亦未
允也

震澤底定

震澤 爾雅吳越之間有具區郭注今吳縣南太湖

即震澤是也 國語越伐吳而戰于五湖又云范蠡

滅吳迄至五湖而辭越斯乃太湖之通稱也虞翻曰

是湖有五道故曰五湖韋昭曰今太湖是也尚書謂

之震澤爾雅以為具區方圓五百里 水經震澤在

吳縣南五十里又曰中江在丹陽蕪湖縣南東至會

稽陽羨縣入于海北江在毗陵北界東入于海注云

地理志曰江水自石城東出逕吳國南為南江江水

自石城東入為貴口東逕石城縣北 水經南江又

東與貴長池水合又南逕宣城之臨城縣南又東與
桐水合又東逕寧國縣南又東北為長瀆歷河口東
南注于具區東則松江出焉江水奇分謂之三江口
顏師古曰五湖在吳越絕書曰太湖周三萬六
千頃沈括曰司馬相如上林賦叙上林諸水曰丹
水紫淵灞澹涇渭八川分流相背而異態灝漾潢漾
東注太湖八川自入大河大河去太湖數千里中間
隔大山及淮濟大江何緣與太湖相涉郭璞江賦云

注五湖以漫漭灌三江而瀚沛墨子曰禹治天下南
為江漢淮汝東流注之五湖孔安國曰自彭蠡江分
為三入于震澤復為北江而入于海此皆未詳攷地
理江漢至五湖自隔山其末乃繞出五湖之下流徑
入于海何緣入于五湖淮汝自逕徐州入海全無交
涉禹貢曰彭蠡既豬陽鳥攸居三江既入震澤底定
以對文言則彭蠡水之所豬三江水之所入非入于
震澤也震澤之源皆山環之了無大川震澤之委則

多大川亦莫知孰為三江者蓋三江之水無所入則震澤壅而為害三江之水有所入然後震澤底定此水之理也沈氏論上林賦及孔安國之誤明矣然以為彭蠡水之所豬三江水之所入是水豬于彭蠡入于三江也豬于彭蠡者江漢之所匯是也入于三江者果何水乎且經言三江既入乃謂三江之水既入于海非謂水入三江也沈氏又云三江之水無所入則震澤壅而為害三江之水有所入然後震澤底定

乃是三江水入海而非水入三江也若以為三江水有所入然後震澤底定則是三江與震澤相通而非岷江漢江也通震澤者惟松江則水經所謂三江口者近之矣然禹貢所言三江既入震澤底定蓋總記揚州水患既平三江之水已入于海無汎濫之患震澤之水亦底于靜定有涵浸之潤灌溉之功未必謂二者相通此有所入而後彼有所定也

瑤琨篠簜

瑤琨 漢地理志琨作瓊

島夷卉服厥篚織貝

島夷 南海島夷織草木為服如今棘貝蕉葛之屬
棘貝 閩俗呼為木棉 漢地理志作鳥夷顏師古曰
鳥夷東南之夷善捕鳥者也卉服絺葛之屬

篚 織貝 顏師古曰織謂細布也貝水蟲也古以為
貨

沿于江海達于淮泗

漢地理志作均江海通于淮泗顏師古曰均平也通
淮泗而入海故云平揚州不言河因徐州而見也
徐州之末言浮于淮泗達于河謂渡淮泗而入河揚
州次徐故言達于淮泗順流而下曰沿沿江海以通
淮泗則浮淮泗可以通河矣左傳沿漢沂江杜預
曰沿順流沂逆流

禹貢指南卷一

欽定四庫全書

禹貢指南卷二

宋 毛晃 撰

荆及衡陽惟荊州

荊州 爾雅漢南曰荊州注云自漢南至衡山之陽
李巡曰荊州其氣燥剛稟性彊梁故曰荊荆彊也秦
為南郡即郢都之渚宮楚之故都也 周禮職方氏
正南曰荊州其山鎮曰衡山其澤藪曰雲夢其川江

漢其浸潁湛注衡山在湘南雲夢在華容潁出陽城
宜屬豫州在此非也湛未聞 晉地理志引春秋元
命苞云軫星散為荊州荊彊也言其氣燥彊亦曰警
也言南蠻數為寇逆其人有道後服無道先叛易警
備也又云取名于荊山荊取名于荊山其義最近荊
者小木名亦曰楚故春秋書楚為荊

江漢朝宗于海

江水 出岷山 水經江水自天彭關東逕汶關而

歷氏道縣北鄺注云益州記曰自白馬嶺迴行二千
餘里至龍涸又八十里至西陵縣又南下六十里至
石鏡又六十餘里而至蜀郡北部始百許步又西百
二十餘里至汶山故郡乃廣二百餘步又西南百八
十里至濕坂江稍大矣故其精則井絡纏曜江漢晒
靈河圖括地象曰岷山之精上為井絡帝以會昌神
以建福故禹貢曰岷山導江泉流深遠盛為四瀆之
首廣雅曰江貢也風俗通曰出珍物可貢獻釋名曰

江共也小水流入其中所公共也

漢水 漢出嶓冢之漾漾水東南流為沔至漢中東行為漢 水經注云山海經漢出鮒嶧山東北流得獻水口庾仲雍曰是水南至關城合西漢水漢水又東北合沮口同為漢水之源也故如淳曰北方人謂漢為沔水孔安國謂漾水東流為沔蓋與沔合也至漢中為漢水是互相通稱也又云沔水一名沮水關駟曰以其初出沮如然故曰沮水也 水經沔水出

武都沮縣東狼谷中因水名縣楚昭王所謂江漢沮漳楚之望也酈注引庾仲雍言漢水自武遂川南入蔓葛谷越野牛逕至關城合西漢水故諸言漢者多言西漢水至葭萌縣入漢又曰始源曰沔是以經云漾水出氐道縣東至沮縣為漢水東南至廣魏白水診其沿注似與三說相符而未極西漢之源矣然東西兩川俱受沔水之名義或在茲班固地理志司馬彪袁山松郡國志並言漢有二源東出氐道西出隴

西縣之嶓冢山闕駟云漾或為洋洋水出崑崙西北隅至氐道重源顯發而為漾又言隴西縣嶓冢山在西西漢水所出南入廣魏白水又云漾水出獮道東至武都入漢許叔重吕忱並言漾水出隴西獮道東至武都為漢水不言氐道然獮道在冀之西北又隔諸川無水南入疑出獮道之為謬矣山海經曰嶓冢之山漢水出焉而東南流注于江然則東西兩川俱出嶓冢而同為漢水者也孔安國曰泉始出為漾其

猶濛耳而常璩華陽國記專為漾山漾水者是作者
附而為山水之殊目耳

九江孔殷

賈耽所記江有八洲與江為九非經意也 孔安國
曰江于此州界分為九道甚得地勢之中 張須元

緣江圖云一曰三里江二曰五州江三曰嘉靡江四
曰烏土江五曰白蚌江六曰白烏江七曰箇江八曰
沙提江九曰廩江參差隨水長短或百里或五十里

始于鄂陵終于江口會于桑落洲 水經九江在長沙下雋西北楚地記曰巴陵瀟湘之淵在九江之間今岳州巴陵縣即楚之巴陵漢之下雋也洞庭正在其西北則洞庭之為九江審矣

沱潛既道

沱水 水經沱水在南郡枝江縣西南其一在郢縣西南皆還入江荊州記沱水在南郡枝江縣三澁地之南邛縣之北

潛水 潛水出天柱山天柱山亦名霍山 孔安國
梁州下注云沱潛發源梁州入荊州 水經注庾仲
雍云墊江有別江出長壽縣即潛水也其南源取巴
西是西漢水也 爾雅曰水自江出為沱自漢出為
潛

雲土夢作乂

爾雅楚有雲夢郭注今南郡華容縣東南巴邱湖是
也 案春秋傳昭公三年鄭伯如楚子產相既享子

產備田具以田江南之夢定公四年吳入郢楚子涉
睢濟江入于雲中則雲與夢二土名杜預曰枝江縣
安陸縣有雲夢蓋跨川亘隰兼包勢廣今德安府有
雲夢縣 晉武帝太康五年立監利縣土卑下澤多
陂池西南自州陵東界逕于雲杜沌陽為雲夢之藪
陸德明釋文夢音莫紅切 漢高帝紀偽遊雲夢
韋昭曰雲夢在南郡華容縣顏師古曰夢讀如本字
又音莫紅切 司馬相如賦吞若雲夢者八九 九

域志安州今德安府安陸縣雲夢鎮昔為縣熙寧三年省縣為鎮入安陸周禮職方氏注雲夢在華容鄭氏據後漢時封域言之今華容為岳州支邑與雲夢隔遠沈括曰舊尚書禹貢云雲夢土作乂至太宗皇帝時得古本尚書作雲土夢作乂詔改禹貢從古本予按孔安國注雲夢之澤在江南不然也據左傳吳人入郢楚子涉睢濟江入于雲中王寢盜攻之以戈擊王王奔鄖楚子自郢西走涉睢則當出于江南

其後涉江入于雲中遂奔鄖鄖則今之安州濟江而後至雲入雲而後至鄖則雲在江北也左傳曰鄭伯如楚王以田江南之夢杜預曰楚之雲夢跨江南北曰江南之夢則雲在江北明矣元豐中予自隨州道安陸入于漢口有竟陵主簿郭思者能言漢沔間地理亦以謂江南為夢北為雲予以左傳審之思之說信然江南則今之公安石首建寧等縣江北則玉沙監利竟陵等縣乃水所委其地最下江南水所出地

稍高雲方土而夢已作又矣此古本之為允也

厥貢羽毛齒革礪砥砮丹

漢地理志礪作厲羽毛作羽旄

三邦底貢厥名

三邦 荊州之域有蠻荆楚三國皆貢筩簞楮顏師
古曰筩簞竹名楮木名皆可為矢言此州界本有三
國致貢斯物其名稱美也 案春秋書荊人來聘即
楚人也詩稱因時百蠻蠻非一國之名謂蠻荆楚為

三邦恐非經意攷工記云才之美者有玢胡之筭鄭
注胡子之國在楚旁豈三邦之類歟

浮于江沱潛漢逾于洛至于南河

漢地理志潛作滯顏師古曰浮以舟渡也逾越也言
渡四水而越洛乃至南河也南河在冀州南江漢去
洛遠而不相通越陸跨洛故曰逾

荆河惟豫州

豫州 爾雅河南曰豫州注云自南河至漢李巡曰

河南其氣著密厥性安舒故曰豫豫舒也 周禮職
方氏河南曰豫州其山鎮曰華山其澤藪曰圃田其
川滎雒其浸波澆注波讀為播春秋傳曰楚子除道
梁澆營軍臨隨則澆宜屬荊州在此非也當攷 釋
名曰豫州在九州中京師東常安豫也秦為三川郡
漢為河南郡後魏置司州又改為豫州 晉地理志
豫州按禹貢為荊河之地豫者舒也言稟中和之氣
性理安舒也春秋元命苞云鉤鈐星別為豫州地界

西自華山東至于淮北自濟南界荆山

伊洛瀍澗既入于河

伊水 水經伊水出南陽縣西蔓渠山東北過郭落
山又東北過陸渾縣南又東北過新城縣南又東北
過伊闕中又東北至洛陽縣南北入于洛酈注曰山
海經蔓渠之山伊水出焉淮南子曰伊水出上魏山
地理志曰伊水出熊耳山即麓大同陵巒互別耳昔
有莘氏女採桑於伊川得嬰兒於空桑中長有賢德

殷以為尹曰伊尹

洛水 水經洛水出京兆謹舉山東尸水注之又東得乳水又東會于龍餘之水又東門水出焉又東逕熊耳山北禹貢所謂導洛自此始山海經曰出上洛西山又曰謹舉之山洛水出焉又曰陽虛之山臨于元扈之水是為洛汭注陽虛鹿蹄以至元扈凡九山通與謹舉為九故山海經曰此二山者洛間也又博物志曰洛水出熊耳蓋開其源者是也 漢志洛作

雒魏畧曰魏文帝詔以漢火行也火忌水故洛去水而加佳魏于行次為土土水之牡也水得土而乃流土得水而柔故除佳加水變雒為洛按字書雒本鳥名一名鳥鷖故從各從佳各聲佳形佳小鳥也漢人忌水借用雒字以代洛字魏復水名本字耳非創變也

灋水 水經灋水出河南穀城縣北山東與千金渠合又東過洛陽縣南又東過偃師縣又東入于洛

澗水 水經澗水出新安縣南白石山東南入于洛
注云山海經白石之山惠水出其陽東南注于洛澗
水出其陰北流注于穀 孔安國曰澗水出澠池山
今新安縣北有一水北出澠池界東南流逕新安縣
而東南流入于穀安國所言當斯水也然穀水出澠
池下合澗水得其通稱或亦指為澗水也澠池屬西
京亦作龜

榮波既豬

滎波 今滎陽在河南春秋衛狄戰于滎陽當在河
北孔穎達謂此澤跨河南北也禹貢不曰滎澤而曰
滎波者堯時滎澤常波今始豬也 或說爾雅曰洛
為波洛受瀍水澗水又伊水之所出其為泛溢滋甚
今始豬也 水經注亦曰滎播又引風俗通曰河播
也謂沆水東流為濟入于河溢為滎則滎波亦謂之
滎播可也又曰穀水又東坡水注之山海經曰瞻諸
山西三十里婁涿之山無草木多金玉波水出于其

陰謂之北答水北流注于穀水經又曰濟水入河與
河合流又東過成臯縣北又東過滎陽縣北注引釋
名曰濟濟也源出河北濟河而南也晉地理志曰濟
自大伾入河與水鬪南洑為滎澤闕駟曰滎波嶧澤
名也故呂忱云嶧水在滎陽謂是水也昔禹塞其淫
水而于滎陽下引河東南以通淮泗濟水分河東南
流 滎周禮詩正義左傳皆作滎

導滎澤被孟豬

潁澤 沅水東出于陶邱北又東為潁澤在濟陰定陶縣東潁音柯亦作苛 漢志潁澤在湖陵盟豬在潁澤之東

孟豬 在梁國睢陽縣東北潁澤之水流溢覆被之也 爾雅宋有孟諸郭注在今梁國睢陽縣東北案梁國今大梁汴州睢陽今宋州大梁之大音泰非小大之大魏有少梁對大梁立名大梁唐為宣武節鎮五代至本朝為京師 杜預曰孟諸澤在梁國睢陽

縣東北逕邛城縣故城南案地理志曰山陽郡山陽縣也王莽更為郃城春秋之郃國也此山陽非楚州之山陽水經明都澤在梁郡睢陽縣東北即孟豬也周禮職方氏青州其澤藪曰望諸漢志作盟豬史記作明都案釋文都音豬則明與盟同盟津之盟音孟此亦當音孟華陽黑水惟梁州

梁州 爾雅無梁青有幽營徐蓋爾雅九州商之制也商時梁州或并于雍也周禮職方氏無徐梁有幽

并蓋周亦併梁歸于雍也周之西南不置州自坤維以西統于雍以南統于荆漢武帝改雍曰涼改梁曰益梁之東北雍之東南以華為畿晉太康地記云梁者言西方金剛之氣彊梁故因名之秦為漢中郡後其地入蜀魏末蜀分廣漢三巴涪陵以北七郡為梁州梁武帝大同中復移在南鄭晉地理志春秋元命苞云參伐流為益州益之為言阨也言其所在地險阨也亦曰疆壤益大故以名焉又曰梁者

言西方金剛之氣彊梁故因名焉

岷嶓既藝

岷山 水經岷山在蜀郡湔氐道西注云漢書以為
瀆山者是也江水出自岷山岷山在成都湔氐道西
徼外江水所出東南至江都入海又云岷山在蜀郡
氐道縣大江所出東南過其縣北注岷山即瀆山也
水曰瀆水又謂之汶阜山在徼外江水所導也益州
記曰大江泉源即今所聞始發羊膊嶺下緣崖散漫

小大百數殆未濫觴東南下百餘里至白馬嶺而歷
天彭關亦謂為天谷秦昭王以李冰為蜀守冰見氏
道縣有天彭山兩山相對其形如闕謂之天彭門亦
曰天彭關江水自此以上至微細所謂發源濫觴者
也漢延平中岷山崩壅江水三日不流揚雄反離騷
自岷山投諸江流以弔屈原

嶓冢山 水經嶓冢山在弘農盧氏縣南注是山也
穀水出其北林又云嶓冢山在隴西氏道縣之南注

南條山也禹貢漾水導自嶓冢山在隴西是也在弘農名偶同耳

沱潛既道

沱潛二水 沱出于江潛出于漢二水發源此州而復出于荊州故于荊州云沱潛既道而于末又云浮于江沱潛漢

蔡蒙旅平

蔡山 書正義蔡山不知所在鄭氏云在漢嘉一說

在雅州

蒙山 在蜀郡青衣縣其上出茶俗呼蒙頂茶

和夷底績

和夷 西南夷

厥土青黎

顏師古曰色青而細疏

厥貢瓊鐵銀鏤砮磬熊羆狐狸織皮

貢璆鐵銀鏤砮磬熊羆狐狸織皮以蜀曰織以裘曰

皮 孔安國曰璆玉名鏤剛鐵貢四獸之皮織金罽
織皮上疑脫罽二字 顏師古曰織皮謂罽也
言貢四獸之皮又貢雜罽也

西傾因桓是來浮于潛逾于沔入于渭亂于河

西傾山 在隴西臨洮縣西南在今洮州桓水出焉
漢地理志作西頃音傾顏師古曰西頃山在臨洮
西南是為中條山

桓水 桓水入潛潛入沔

沔水 出嶓冢山為漾水東南流為沔沔至漢中東
行為漢詩沔水傳沔水流滿也詩雖汎言流水此沔
之名義則同 顏師古曰漢上曰沔正絕流曰亂言
渡潛越沔得入于渭遂橫流濟河也或疑禹貢言西
傾因桓是來繼言浮于潛逾于沔入于渭意謂自桓
入潛自潛入沔自沔入渭非也蓋沔在梁州山南渭
在雍州山北無入渭之道經言逾者逾越也自沔越
陸而入渭其不相通可知顏師古謂越沔得入于渭

是也 蘇氏曰雍州之達帝都必自西傾自西傾因
桓水而來浮潛而逾沔至渭陸行百餘里然後逾渭
以亂于河亂者絕流之義也蓋自西傾因桓至亂于
河皆是此州達于帝都之道

黑水西河惟雍州

雍州 爾雅河西曰雍州注云自西河至黑水李巡
曰河西其氣蔽塞厥性急凶故曰雍雍壅也 周禮
職方氏正西曰雍州其山鎮曰嶽山其藪澤曰弦蒲

其川涇汭其浸渭洛

洛在渭北非河南洛水

地理風俗記曰

漢武帝元朔三年改雍曰涼州以其金行土地寒涼

故也

後漢獻帝以武帝改雍曰涼又分渭川河西

郡為雍州至建安十八年復改為涼州

晉地理志

雍州以其四山之地故以雍名焉亦謂西北之位陽

所不及陰陽氣雍闕也

釋名曰雍翳也東嶠西漢

南商北居庸四山之所擁翳也

弱水既西

弱水 鴻毛不載至酒泉合黎張掖郡居延縣東北
居延澤即流沙河也合黎山水經謂之合離在酒泉
會水縣東北注云即合黎山也地志弱水出刪丹縣
亦謂之張掖河

涇屬渭汭

渭水 導出鳥鼠山會四水然後入河詳見導川卷
內

涇水 渭清涇濁漢溝洫志涇水一石其泥數斗

九域志今涇州有涇水屬秦鳳路 鄭氏謂涇水出
洛陽指渭北洛水之陽陽水北也

漆沮既從

漆水 渭水東過漆沮入于河 水經漆水出扶風
杜陽縣俞山東北入于渭注云山海經榆次之山漆
水出焉北流注于渭蓋自北而南矣史記夏本紀引
禹貢導渭水東北至涇又東過漆沮入于河孔安國
曰漆沮二水名亦曰洛水也出馮翊北周太王去邠

度漆逾梁山止岐下故詩云民之初生自土沮漆又
曰率西水潏至于岐下是符禹貢本紀之說許慎說
文稱漆水出右扶風杜陽縣岐山東入渭從水泰聲
又云一曰漆城池也潘岳關中記曰關中有涇渭灃
澹鄠鄩漆沮之水鄠鄩漆沮四水在長安西南鄠縣
皆注于渭

沮水 水經沮水出北地直路縣東過馮翊祿祿縣
北東入于洛注云地理志沮水出畿縣西東入洛鄭

渠在漢太上皇陵東南濁水入焉俗謂之漆水又謂之漆沮其水東入洛孔安國謂漆沮一名洛水此言漆沮東入洛非漆沮即洛水也長安志洛水在渭北東南流入渭蓋漆沮入洛故俗呼漆沮為洛耳漢地理志漆水出漆縣西關駟十三州志云漆水出漆縣西北岐山東入渭顏師古曰漆沮即馮翊之洛水也澧水出鄠之南山言漆沮既從入渭澧水亦來同也又漢五行志引史記周幽王二年三川皆震師古曰

涇渭洛也洛即漆沮也水經注又引闕駟十三州志
曰馮翊萬年縣西有涇渭北有小河謂漆水也其水
西南逕郭狼城西與白渠枝渠合又南入于渭水其
一水東出即沮水也沮水又自沮直絕注濁水至白
渠合焉故濁水得漆沮之名也

澧水攸同

澧水 出扶風鄠縣東南北過漢上林苑入渭澧音
豐 水經渭水又東澧水從南來注之注云地說曰

渭水又東與澧水會于短陰山內水會無他高山巽
巒所有唯原阜石激而已水上舊有便門橋漢武帝
建元三年造如淳曰去長安四十里 漢地理志澧
作豐

荆岐既旅終南惇物至于鳥鼠

荆山 在馮翊懷德縣南 荆山有二一在南郡臨
沮縣東北在梁州者謂之南條在雍州者謂之北條
西傾山在隴西臨洮縣西南謂之中條 左傳昭公

四年晉大夫司馬侯曰四嶽三塗陽城大室荆山中
南九州之險也杜預曰荆山在新城沛鄉縣南沛音
市鄉音向漢地理志注荆山在岐東

岐山 水經曰在扶風美陽縣西北左傳椒舉曰

成王有岐陽之蒐山海經曰其上多白金其下多

鐵減水出焉東南流注于江顏師古漢書注曰岐

山在今岐山縣其山兩岐俗呼為箭栝嶺

終南山 扶風武功縣東有太一山即終南山也

左傳司馬侯所言中南杜預注曰在始平武功縣南
漢地理志右扶風武功縣注大壹山古文以為終
南垂山古文以為敦物二山皆在縣東

惇物山 扶風武功縣東有垂山即惇物山也 水
經華山為西嶽在弘農華陽縣西南注云即古文之
惇物山也

鳥鼠山 水經鳥鼠同穴山在隴西首陽縣西南注
曰鄭康成云鳥鼠之山有鳥焉與鼠飛行而處之又

有止而同穴之山焉是二山也鳥名為鶡似鷄而黃
黑色鼠如家鼠而短尾穿地而共處鼠內而鳥外孔
安國曰共為雌雄杜亮威曰同穴止宿養子互相哺
食長大乃止張晏言不為牝牡故因以名山爾雅其
鳥為鶡其鼠為鼯

原隰底績至于豬野

豬野 幽地武威縣東有休屠澤即豬野也休屠音
朽儲水經都野澤在武威縣東北注云縣在姑臧城

北三百里東北即休屠澤也古文以為豬野其水上
承姑臧武始澤澤水二源東北流為一水姑臧縣故
城西東北流

三危既宅三苗丕叙

三危山 水經三危山在燉煌縣南燉煌音屯皇注
云山海經三危之山三青鳥居之是山也廣員百里
在鳥鼠山西即書所謂竄三苗于三危也杜林曰燉
煌古瓜州也州之貢物地出好瓜民因名之自漢武

帝後元年分酒泉置南七里有鳴沙山故亦曰沙州也左傳云先王居檣杙于四裔故允姓之姦居于瓜州杜預曰允姓之祖與三苗俱放于三危瓜州今燉煌也

厥田惟上上厥賦中下

右九州之田雍青徐為上豫冀兗為中揚梁荆為下蓋河之末流在兗江之末流在揚二州多水患梁地多山兗賦居最下等尤輕于揚故兗賦為正梁之賦

輕于揚重于兗故言三錯兗之田下冀一等而賦下
冀八等以山澤多河為大患也梁下冀一等而賦下
冀五等以山林多江為大患也荆田下中賦上下則
以其宜稻雍田上上徐田上中青田上下地勢雖高
然皆依于川故其旱乾又有灌溉之利故青州上下
之田也而賦中上徐州上中之田也而賦中中雍州
上上之田也而賦中下皆以上地出中賦然地彌高
者賦彌薄以其高則有旱乾之虞冀田中中則其高

可以備水溢卑可以無旱乾故其賦第一鄭康成曰冀州入穀不貢下云五百里甸服傳云為天子服治其田是田入穀故不獻貢篚差異于餘州也甸服止方千里冀之北土境界甚遙遠都之國必有貢篚此舉其大畧而言也豫州之田中上則高于冀一等故其賦上中則下于冀一等冀賦上上錯則雜出與豫等豫賦錯上中則雜出與冀等二州之田與賦相去亦不遠矣若荆之田高于揚一等而已其土又與揚

同而賦加揚四等何也荆揚下地于穀宜稻荆少高
焉則水有所洩異於揚矣

右九州之賦唯出正賦而無雜賦者五州兗青徐荆
雍也有雜賦者四州冀揚豫梁也冀州言賦上上錯
蓋上上多而上中時少多者為正少者為雜言上上
錯者雜在正下故言上上而後言錯豫州言錯上中
者雜在正上故先言錯而後言上中揚州言下上上
錯不言錯下上者以本設九等分三品為之上中下

下上本是異品故變言耳梁言下中三錯者梁州賦
有三等其出下中時多故下中為正上有下上下有
下下三等故言三錯明雜出有下上下下可知也
浮于積石至于龍門西河會于渭汭

顏師古曰積石山在金城西南龍門山在河東之西
界皆河水所經逆流曰會自渭北涯逆水西上也
織皮崑崙析支渠按西戎即叙

織皮崑崙析支渠按 織皮上疑簡編脫厥篚二字

不然則是史變文耳禹貢之篚皆在貢後立文而青
徐揚三州皆萊夷淮夷島夷所篚獨梁州不言篚而
云熊羆狐狸織皮雍州不言篚而云織皮崑崙析支
渠搜西戎即叙織皮云者以屬曰織以裘曰皮言西
戎即叙而後崑崙析支渠搜三國篚織皮以獻但古
語有顛倒詳畧耳三國在荒服之外流沙之內羌髳
之屬皆就次叙美禹之功被戎狄也文當在厥貢球
琳琅玕下簡脫在末也漢地理志渠搜作渠叟崑崙

作昆崙

右九州之名因革不同案周公職錄云黃帝受命風
后受圖割地布九州鄒子曰中國為赤縣赤縣之內
有九州春秋說題辭曰州之言殊也爾雅釋水云水
中可居曰洲李巡曰四方有水中央高獨可居故曰
洲天地之勢四邊有水鄒衍書說九州之外有瀛海
環之是九州居水內故以洲為名共在一洲之上分
之為九耳漢地理志堯遭洪水懷山襄陵天下分為

十二州使禹治之水土既平更制九州由是觀之九

州

原缺二字

當堯之時九年之水疆理錯亂故禹復治而

別之至

原缺四字

盛肇十有二州分冀為幽并分青為營

更三代復

原缺十字

爾雅兩河間曰冀州河南曰豫州河

西曰雍州漢南曰荊州江南曰揚州濟河間曰兗州

濟東曰徐州燕曰幽州齊曰營州郭璞注曰此蓋商

制周禮職方氏東南曰揚州正南曰荊州河南曰豫

州正東曰青州河東曰兗州正西曰雍州東北曰幽

州河內曰冀州正北曰并州

原缺八字

帝都所在天傾西

北地不滿東南治水自下始故由冀而東南次兗由
兗而東南次青由青而東次徐由徐而南次揚由揚
而西次荆由荆而北次豫由豫而西次梁由梁而北
次雍此先後始終之序也職方氏先揚次荆先南方
蓋取尊其陽方也後漢獻帝建安十八年春正月庚
寅復禹貢九州又獻帝春秋曰時省幽并州以其郡
國并于冀州省司隸校尉及涼州以其郡國并为雍

州省交州并為荊州益州于是有兗豫青徐荆揚冀
益雍也九數雖同而禹貢無益州有梁州然梁益均
此地也又職方氏注云此州界揚荆豫兗雍冀與禹
貢畧同青州則徐州地也幽并則青冀之北也無徐
梁漢時兩河屬司州蓋屬京師司隸校尉所部故曰
司州昭帝始元元年有司請河內屬冀州河東屬并
州凡九州之末皆言由諸水入河如冀兗徐荆豫
梁雍州各自言河惟青揚二州不言河耳兗州云浮

于濟漯達于河故青州直云達于濟徐州云浮于淮
泗達于河故揚州云達于淮泗皆記禹入河之道也
孔安國以為禹治水畢還白于帝所以治其道由此
鄭康成以為治水既畢更復行之觀地肥瘠定貢賦
上下王肅云凡州之下說諸治水者也功主于治水
故詳記其所治之州往還所乘涉之水名三說皆未
通惟近世周希聖以為天子之都必求舟楫之所可
至使諸侯之朝貢商賈之貿易雖其地遠而轉輸甚

易此說為長禹貢上言田賦貢篚之事而下言所以達都之道則九州賦入視貢篚為尤重此蓋轉輸之大者也九州惟梁雍二州西境與羌戎連接地界闊遠與七州不同荆揚雖地接百越然界以五嶺諸山連亘自川蜀至明越山之北水皆北流其南皆南流以入南海亦不甚遠並為中國故山川地理灼然可攷若梁雍之西隔以羌戎諸國去西海遠甚多與中國不通故禹貢叙二州西境皆以黑水為界故雍州

首言弱水既西而導川亦止言餘波入于流沙而不
竟其所歸二州雖以黑水為界而不叙黑水濬導經
歷之曲折導川亦止導黑水至于三危入于南海夫
自雍至梁自梁至南海其遠可知而載之甚畧豈非
以其闊遠而不勝紀乎抑其無與中國生民之休戚
而畧之乎史志及諸家言黑水弱水互有異同率多
牴牾姑撮其梗概辨其誤而闕其疑以俟博達君子
而折衷焉

弱水 漢志云在西王母石室近酒泉崑崙山又云
弱水出條支漢西域傳媯水自于闐之西逕大夏西
流至條支入西海或以此為弱水水經刪丹弱水出
酒泉合黎以居延澤為流沙河在東合黎在西班固
許叔重同此說若東入居延澤又西入合黎是分流
非餘波入流沙亦非既西也與經恐不合廣韻云弱
水出龍道山隋志弱水在張掖又別有弱水堡扶州
唐史弱水在甘州城北張掖郡名張掖河亦名副援

河又云甘峻山賈耽同此說唐史又云小勃律娑夷
河東女康延川是弱水娑夷河在天竺東于闐南不
西流康延川南流亦不西流樊綽蠻書蘭蒼江源出
大雪山下莎川又云康延川南流其國東接茂州東
南接雅州皆在益州西非雍州境或以為此乃黑水
亦與經不合


黑水 水經云出張掖雖川南流至燉煌過三危入
于南海或謂張掖在甘肅二州界隔大河不能至南

海漢志犍為南廣縣有符黑水向北流入江言北流入江非經之黑水明矣杜佑謂此黑水逕沙州三危山過南溪而入南海犍為即唐戎州沙州與戎州隔大河又隔金城南山及西南夷山亦不能入南海隋志黑水在扶州李吉甫元和郡縣志漢武通西南夷分雍之南置益州益州本滇王國因滇池立名黑水祠在其地孔穎達以為有祠無水則滇池亦非黑水也樊綽蠻書黑水一名麗水出三危山之南過邏些

城蒼望城蒼王道勿川合彌諾江經驃國入西海之
南邏些城在蜀西非雍州界經言導黑水至于三危
是在三危北南流過三危今言麗水出三危南與經
不合或謂漢志勞水出徼外會葉榆水入南海疑葉
榆是黑水然葉榆澤在雋州南界益州葉榆縣西南
流過滇池縣西珥河會勞水南流入南海水經葉榆
水出益州入牂牁西過交趾分為五水復合為三東
入海樊綽蠻書葉榆西流過點蒼山至兩江口與摩

耶江合又云浪穹河巴嶠河劍河三水俱入黃塘江
過西洱河為摩耶江乃與葉榆江合然則葉榆江與
西洱河自是兩派又與漢志相牴牾况葉榆水在蜀
之正西西行又東流入海去雍州遠甚亦與經不合
觀先儒所刊禹迹圖黑水在雍州西北而西南流至
雲南之西南乃有黑水口東南流而入南海中間地
理闊遠不復圖其所經蓋亦古人略而不詳之遺意
抑以諸家之說各有闕失難以攷信不容以臆說傳

會歟



卷之三

禹貢指南

禹貢指南卷二